

Ti xroon chr'éhen Pablo ti sin Éfeso

Pablo kjihin xroon ti
sin ninko Éfeso

1 ¹*Janhan Pablo, kjueyá Díos k'lóna apóstol kuènté Jesucristo kixin xikaha kóxríhìn ch'an. Mé ikjian ti xroon i chr'ahánra jahara tjejora Éfeso tinkáchónkira Díos la ko titekáonra Ìnchéni Jesucristo. ²It'éni Díos la ko Ìnchéni Jesucristo sincheñaora la ko ts'ayéhéra ti kjuaxróxin tjajon ch'an.

Ts'áyéheni ti nkehe
jína kuènté Cristo

³Chjéheni kjuasáya Díos, It'é Ìnchéni Jesucristo, kixin Díos mé kjuíncheñaon ti jeheni tinkáchónkini Ìnchéni Jesucristo la ko kjuajon ch'an kaín nkehe jína kjuixìn nkaya nkajní. ⁴Díos mé kjueyá ti jeheni ti naxa k'lónahña chjasintajni kixin chrókuinkáchónkini Cristo la ko tjóá chrók'uejóni ti itjen ch'an, í chróchóntahyani ninkehó ijie. ⁵Imá tjuéhe Díos ti jeheni,

andá tsíkjeýá ch'an ti jeheni kixin ts'ónani xjeen ch'an kixin tsinkáchónkini Jesucristo. Kaín tíhi mé tsíkjenkayáxin Díos ósé. ⁶Mé xikaha nkochrírín tsochjéheni kjuasáya Díos kixin ti kjuachaxin ijie kjuakoxin ch'an ti kjuíncheñaon ch'an ti jeheni kixin tsinkáchónkini ti xjeen ch'an imá tjuéhe ch'an. ⁷*Díos imá tjuéhe ti jeheni, ndá kjuínchekaá ch'an ti jeheni kixin ti Xjeen ch'an kjuenkayákohen ti ijieni. Mé xikaha kjuenka ch'an kixin tso'tjuáxin kaín ti ijie chóntani. ⁸Díos mé kjuakoxin kixin imá tjuéhe ti jeheni la ko kjaxin kjuajon ch'an kjuaxrexinkaon jína la ko kjuachaxin ijie kixin chrókienxíni jína. ⁹La kjaxin kjuínchenohe Díos ti jeheni ti nkehe jehó ch'an tsíkjenkayáxin ch'an, mé ti nkehe tjinkaon ch'an chróxiteyá kixin ikui Cristo, la tíha mé ninkexró kónoehña. ¹⁰Ti nkehe tsíkjenkayáxin Díos la tsoxiteyá ti tsjixraká ti ñao tsíndáchro ch'an. Landá ti ñao

a la Díos tsjajon kjuachaxin kixin Jesucristo ts'etuehen kaín nkehe, ti nkehe siín nkajní la ko chjasintajni.

¹¹ Kixin ti tinkáchónkini Cristo, la Díos tsíkjeýá ti jeheni ósé kixin ts'áyéheni ti nkehe tsjajon ch'an tsitonheni. Mé kaín tíhi tsohen éxi tsíkjenkayáxin Díos. ¹² Mé xíkaha kaíni ó kuitekaoni Cristo, mé chróchjéheni kjuasáya Díos kixin ti kjuachaxin ijié chóna ch'an. ¹³ Kjaxin jahara ó kuihínra ti itan jína, chronka nkexrín tsaáxini, andá ó kuinkachónkira Cristo. La k'ónara chojni kuènté Díos kixin k'uayéhéra ti Nchakuén Díos, éxi tsíndáchro ch'an. ¹⁴ Ti k'uáyéheni ti Nchakuén Díos mé noexíni kixin ts'áyéheni kaín ti nkehe tsjajon ch'an ti ó tsjintaxín sinchekaá ch'an ti jeheni k'ónani xjeen ch'an. Méxra chrókuikosáyeheni Díos kixin ti kjuachaxin ijié chóna ch'an.

**Kjuanchia Pablo kixin
antsí tsonohe sin**

¹⁵ Mé xíkaha janhan ó kuihan kixin imá tinkachónkira Ìnchéni Jesús la ko imá tjuéhéra kaín ti íso sin tinkáchónki Díos, ¹⁶ méxra janhan la tituáhya tjahá kjuasáya Díos kixin ti jahara, la ti ó nixjahá ch'an mé xráxinkaoan ti jahara. ¹⁷ Tjáncháha Díos, It'é Ìnchéni Jesucristo, imá chóna kjuachaxin, kixin Nchakuén

ch'an chrókuintanohara jína kixin chrókiénxinra ti nkehe kuènté Díos kixin jína tsochoxínra ti jehe ch'an.

¹⁸ La ko kjaxin tjáncháha Díos kixin jehe ch'an chrótjáhara ti kjuaxrexinkaon jína kixin chrókónohara kaín ti nkehe chrók'uejochohénra kixin xíkaha tsík'eyahara ch'an, la ko tsonohara kixin imá tjete ti nkehe sinchekitonhen ch'an ti sin kuènté ch'an. ¹⁹ La ko kjaxin tsonohara kixin ti kjuachaxin kuènté Díos mé ijnko nkehe imá ijié, mé chónahya nketí tsjejexin. Ti kjuachaxin kuènté Díos mé ich'e ixra nkaya aséni kixin jeheni tinkáchónkini Cristo. Mé tíhi nkokón kjuachaxin kjuakoxín Díos ²⁰ *ti ó kjuínchexechón ch'an Cristo la ko kjuajon ch'an kjuachaxin kjuák'etjaxin Cristo ti itja ch'an chjina ti nkaya nkajní.

²¹ Andá xíkaha k'uáyéhe Cristo kjuachaxin ts'etuehen kaín nkehe siín nkajní la ko chjasintajni, ijie la ko nkochrín. ²² *Mé xíkaha Díos chjéhe Cristo kjuachaxin ts'etuehen kaín nkehe siín, la ko kjuajon ch'an kjuachaxin kixin Cristo ts'etuehen ti nínko, mé t'axrxjín kixin jehe ch'an mé ikja ti nínko. ²³ Ti nínko mé ti cuerpo kuènté Cristo, la jehó Cristo mé t'etuehen tíhi la ko jehó ch'an mé kuènté kaín ti nkehe siín.

**Kuaáni kixin tjeuhe
Díos ti jeheni**

2 ¹*Ósé la éxi tsík'enra xikaha kuék'ejora, kixin k'uékjásinra ijie la ko kuitekákonnhãara Díos, andá ijie la Díos mé kjuínchekitonhanra ti kjuachón kixin titekáonra Cristo. ²Mé xikaha k'uéchrehéra ti nkehe jínahña ich'e ti chojni naxa tjenkayáxin ti nkehe síin chjasintajni. K'uékjinchexiteyára éxi tóxríhin ti jínahña t'etuehen ti xrinto la ko t'etuehen kaín ti chojni titekakuenhña Díos. ³Mé kaíni xikaha kuék'ejóni ósé, k'uékuitekaoni ti nkehe jínahña k'uéndáchro aséni la ko ti nduáhya k'uekjenkayáxini. Méxra Díos la jína chrókjuinchekjasóte ti jeheni éxi tsjasóte ti iso chojni kuítেকakonnhãa. ⁴Kjánchó Díos imá kuikonoéhe ti jeheni la ko imá tjeuhe ch'an kaíni. ⁵Méxra, kjónté éxi tsík'eni kuék'ejóni kixin ti ijie k'uéchóntani, la Díos kjuajon kjuachaxin kixin xechónkuéni Cristo la ó chóntani ti kjuachón. La kjuínchekaá ch'an ti jeheni kixin tjeuhe ch'an ti jeheni. ⁶Díos mé kjuínchexechón Cristo Jesús la ko kjaxin jeheni xechónkuéni Cristo, ndá xikaha kjuajon Díos kjuachaxin ts'ejókoni Cristo nkaya nkajni. ⁷Mé xikaha kjuích'e Díos kixin ijie

la ko nkochríchín kjuakoxin ch'an kixin imá tjeuhe ch'an ti jeheni, la kjuínkítsa ch'an kixin tinkáchónkini Cristo Jesús. ⁸Díos imá tjeuhe ti jeheni, la kjuajon ch'an ti kjuachón kixin titekaoni Cristo. Jehya kixin ichrén ixra chrókjuích'eni ndá chrók'uáyéheni ti kjuachón. Náhí. Kixin imá tjeuhe ch'an ti jeheni la kjuajon ch'an ti kjuachón. ⁹La jehya kixin ijnko ixra jína chrókjuích'eni ndá chrókjuinchenkexíni kixin ó kuaáni. Náhí. ¹⁰Díos kjuích'éna ti jeheni kixin jína sich'eheni ch'an ixra kixin tinkáchónkini Cristo Jesús, mé xikaha kjuénkayáxin ch'an ósé.

**Kjuaxróxin tjejóni kixin
titekaoni Cristo**

¹¹Méxra xráxinkaonra nkexrín kuék'ejora ósé. Jahara jehya chojni judío la chontahyara ti xroye. Andá k'uéndáchro sin kixin jahara jehya chojni kuènté Díos kixin chontahyara ti xroye ncheka ti sin judío ti cuerpo kuènté. ¹²Mé xikaha ósé la jahara k'uékitekákonnhãara Cristo. Jahara jehya kuènté ti nación Israel la ko k'uéchonnhãara ti nkehe tsík'etogan Díos la ko ti nkehe tsíndáchro Díos tsjajon. Méxra kuék'ejora ntihi chjasintajni, k'uéchonnhãara Díos la ko k'uéchontahyara ijnko

nkexro chrókuaáxinra. ¹³Andá ijie la ó titekáonra Jesucristo, la kjónté ti ósé la ikjín kuék'ejora, k'uéchonhñara Díos, la ijie ó kóchjinara ti itjen ch'an kixin k'uenyákohen Cristo ti jahara, la ko ti ijníe ch'an k'uitjí. ¹⁴Cristo mé tjejóxini kjuaxróxin kixin ti sin judío la ko ti sin jehya judío la k'óna sin nkokqa chjasin kixin Cristo k'óxika ti kjuanínkaon kuènté sin kixin éxi ijnko tjat'o tjenkákúèxin tíha.

¹⁵*Cristo mé kjuasóte ch'an ndá kjuacha ch'an kjuínchek'itjáña ch'an ti kjuachaxin k'uéchónta ti ley kuék'etoan. Éxi yaá chjasin kuék'ejóni, ndá Cristo kjuíchéna nkokqa chjasin nixin, kixin nkokqa tsinkáchónkini ti jehe ch'an. Mé xikaha kjuíche ch'an ndá k'uíxin kjuaxróxin.

¹⁶*Mé xikaha k'uenyákohen Cristo ti jeheni ti k'uénxin ch'an ti ntacruz, la kuakjiin ch'an ti kjuanínkaon k'uéchónta ti yaá chjasin, mé ti chojni judío la ko ti chojni jehya judío, kixin kjuaxróxin ts'ejóko sin Díos la ko ts'óna sin éxi nkokqa cuerpo.

¹⁷*Kixin Cristo la ikui chronka ti itan jína tjajon kjuaxróxin kixin jína chrók'uejóni kaíni, ti jahara ikjín kuék'ejora, k'uéchonhñara Díos la ko ti jeheni chojni judíoni chjino kuék'ejóni kixin k'uéchóxini ch'an. ¹⁸Mé kjuasáye Cristo, kixin kjónté chojni judío o jehya

judío, la kaíni jína tsóchjinehene It'éni Díos kixin nkokón k'uáyéheñi ti Nchakuén ch'an.

¹⁹Mé xikaha jahara, la ijie í jehya chojni tsikjixin ókjé, la ko chróndáchrohýara kixin jehya nontara tjejora. Náhí. Kaíni la k'ónani ijnko chjasin kixin nkokqa tinkáchónkini Díos la ko k'ónani chojni kjéhya Díos. ²⁰Jahara mé k'ónara éxi ijnko nchia tjat'o ijie kjuák'e chritaón ti ixro k'uejo ti sin kjueya Ìnchéni Jesús la ko ti sin tsíchr'án Díos tsíchronka itén ch'an ósé. Landá Jesucristo mé ti ixro imá tjetooan xránkíxixín ti nchia. ²¹Ti xránkíxixín ti tjat'o mé Cristo la kuènté ti nchia la ts'ánki kixin yóxin tsjak'e, andá ti ó tsjixin la ts'óna ijnko njnko tjóá kuènté Ìnchéni. ²²Mé xikaha kjaxinra nkokqa tinkachónkira Cristo la éxi nkokqa nchia ts'ónara kixin ts'óna ti nchia kuènté Díos, la ntiha tsjak'e ti Nchakuén ch'an.

Pablo k'uáyéhe ti ixra tsjakohé ti sin jehya judío

3 ¹Mé xikaha janhan Pablo tjechjina kixin xrjanká ti itén Cristo Jesús kixin jahara, chojni jehya judío, jína chrókuitekáonra Cristo la nixjahá Díos kixin ti jahara. ²Ó nohara kixin Díos imá tjeuhe ti jeheni la kjuajon ch'an ti ixra i k'uayáha kixin

tsjákohára ti itan jína. ³Díos mé kjuínchenona ijnko nkehe ninkexró noehña kjuénkayáxin ch'an ndesi ósé éxi ti ikjian senó. ⁴*Ti ó sinchekuáxinra ti xroon i, la tsonohara nkexrín tianxian ti nkehe kuèté Cristo k'uékienxínhña chojni. ⁵Ti nkehe i mé ninkexró k'uénoehña ti ósé. Andá ijie kjuachaxien Nchakuén Díos la kjuínchenohe ch'an ti sin tsíkjeýá Ìnchéni Jesús sich'e ixra la ko ti sin chrónka itén ch'an. ⁶Ti nkehe ninkexró k'uénoehña mé tíhi: kixin ti itan jína tsaáxin chojni, la ti sin jehya judío la ko ti sin judío la nkokón ts'áyéhe sin ti nkehe jína tsjajon Díos, la ts'óna sin nkoqoa cuerpo kuèté Cristo la ko nkokón ts'áyéhe sin kaín ti nkehe tsíndácho Díos tsjajon kixin kuitekaon sin Cristo Jesús.

⁷La ijie kjuákoxin Díos kixin imá tjuana la kjuajon ch'an ti ixra i sit'a kixin tsoxrjanka ti itén Díos kixin ti kjuachaxin kuèté ch'an k'uayáha. ⁸Janhan la kanhño tjetooan ke ti iso sin tsíkjeýá Ìnchéni, kjánchó Díos mé kjuínchekitona ti ixra imá tjetooan kixin tsotjanka ti sin jehya judío ti itan jína kixin imá tjete ti nkehe kuèté Cristo la tsjachahya tsjenkayáxini nkekjaín sínki tíha. ⁹Ti ixra k'uayáha la tsotjanka kaín chojni nkexrín tsíkjenkayáxin Díos ósé, ti nkehe ninkexró k'uénoehña,

la jehó Díos, ti nkexro kjuích'éna kaín ti nkehe síin, mé k'uénohe. ¹⁰Mé xíkaha kóhen kixin ijie la ti sin nínko chrókjuákoxin sin ti kjuachaxin ijie kuèté Díos kixin tsonohe kaín ti sin ángel la ko kaín ti sin chóna kjuachaxin tjejó nkajni nkexrín ijie ti kjuachaxin chóna Díos la ko ti imá nohe ch'an. ¹¹Mé xíkaha xráxin tsíkjenkayáxin Díos, andá Ìnchéni Jesucristo ikui la kjuínchexiteýa kaín tíha. ¹²Méxra kjuasáye Cristo kjuajon ch'an kjuachaxin kixin jína tsöchjineheni Díos kixin tinkáchónkini ch'an. ¹³Mé xíkaha xrjanoáhára chrók'óxrjéhyara, chrókuinkachónkira Ìnchéni, kjónté kuihínra kixin ntihi itjén tjétjasótexína ti jahara, la tíha kóhen kixin chrók'uejoxinra jína.

Cristo imá tjehe ti jeheni

¹⁴Mé xíkaha tjak'éxian toch'ian tjikosáyaha It'éni Díos, ¹⁵It'é kaín ti nkexro síin nkaya nkajni la ko kaín ti nkexro síin chjasintajni, kuitekaon sin ti ihnié ch'an. ¹⁶Tjáncháha It'éni Díos chóna kaín kjuachaxin kixin ti Nchakuén ch'an chrók'uetuehen ti asánra kixin antsí chróchontara ti kjuachaxin kuèté ch'an. ¹⁷Kixin xíkaha Cristo chrókjuák'e nkaya asánra kixin tinkachónkira ch'an landá antsí chrótjuehéra kichuara la ko ndoa chrók'uejora éxi

ijnko inta ninka tsíkji nuèé.
¹⁸Mé xikaha jahara la ko kaín ti sin tinkáchónki Ìnchéni mé chrókiénxinra nkexrín tonxín, kjíjinxin, ninkaxín la ko ntetoxín ti tjehe Cristo ti jeheni. ¹⁹Tjáncháha Díos kixin chrókónohara antsí nkexrín imá tjehe Díos ti jeheni, kjónté tsjachahya chojni tsienxín kaín tíhi. Ndá xikaha jína tsochontara kaín ti kjuachaxin tsjajon Díos.
²⁰Ndá ijie chjéheni kjuasáya Díos kixin jehe ch'an chóna ch'an kaín kjuachaxin la ko antsí tsjajon ch'an ke ti kjuancheheni ch'an, kjónté naxa kjuénkayáxinhñani chrókjuajon ch'an, kixin ó kjuajon ch'an ti kjuachaxin kuènté ch'an ich'e ixra nkaya aséni. ²¹Kjuasáye Díos kixin Ìnchéni Cristo Jesús kjuínchekaá ti ninko, mé xikaha ticháxin tsjikosáyeheheni ch'an nkochrírín. Mé xikaha tsohen.

**Nkokón chóntani
 Nchakuén Díos**

4 ¹Janhan mé ntihi itjén, tjéchjínaxián ti ixra kuènté Ìnchéni, la xrjanoáhara kixin chrókuitekáonra la ko jína chrók'uejora éxi tjinkaon Díos chrók'uejó kaín ti sin kjueyá ch'an. Mé xikaha kjueyá Díos ti jahara. ²*Méxra chrókjuínchejínara asánra la ko nkojína chrónixjehéra kichuara, chrókónínkakuénhñara,

chrókjuínkítsara la ko chrótjuehéra sin. ³La chrókóxakohanra kixin chaxín nkokoa chrókjuenayáxinra la Nchakuén Díos mé tsjínkítsara kixin kjuaxróxin chrók'uejora. ⁴Itjen nkokoa cuerpo la ko nkokoa Nchakuén Díos la Díos kjueyá ti jahara kixin nkokoa nkehe chrók'uejochohénra. ⁵Nkokoa Ìnchéni, nkokoa nkexro titekaoni la ko nkokoa kuikiteni. ⁶Nkokoa Díos la tíha mé It'éni kaíni. Jehe ch'an mé t'ayakohen ch'an kaín nkehe la ko t'etuehen ch'an kaín chojni la ko ti Nchakuén ch'an mé chóntani kaíni.

⁷Méxra nkojnkonni k'uáyéheni nkojnko kjuachaxin kjuajon Ìnchéni éxi tjinkaon ch'an. ⁸*Mé xikaha nixja ti xroon itén Díos: Jehe ch'an ti sákjuí ch'an nkajní la kjuíko ch'an ti sin k'uénínkakohen ti jehe ch'an la kjuínchekitonhen ch'an nkojnko chojni titekaon ti jehe ch'an ti ixra sich'e sin.

⁹¿Andá nkehe t'axrjexín kixin sákjuí ch'an? Tíhi mé t'axrjexín kixin jehe ch'an mé kuixín ch'an nkajní la kjuák'e ch'an chjasintajni. ¹⁰Ndá nkexro ti k'uínkajinxin nkajní la kjaxin sákjuí inaá, ti nkajní imá noi kixin ts'etuehen ch'an kaín nkehe síin chjasintajni la ko nkajní. ¹¹Ìnchéni chjéhe ch'an

kjuachaxin nkojnko chojni, la kjueyá ch'an iso sin k'óna apóstol, iso sin tsochronkaxín ti itén Díos, la iso sin tsochronka sin ti itan tsaáxin chojni, iso sin ts'óna chojni ts'ayakohen ti nínko la ko iso chojni tsjako ti itén Díos. ¹²Mé xíkaha ti ixra k'uáyéhe ti sin kjueyá Díos kixin sich'ehe sin ch'an ixra kixin xíkaha ts'ánkí ti cuerpo kuèté Cristo. ¹³Mé xíkaha kaíni nkokoa tsinkáchónkini ti Xjeen Díos la ko tsochóxini ch'an jína kixin xíkaha ts'ónani ijnko chojni chaxín nchexiteyá la ko tsochóntani kjuachaxin éxi chóna Cristo. ¹⁴Méxra jeheni la chrók'ónahñani éxi ixjan intsí, kixin ti ixjan ntsí la xrahya tjínki sin ti nkehe tjenkayáxin sin éxi ijnko xrinto chrókui sáchrókuiko ijnko nkehe, mé xíkaha jehe sin, kixin tihin sin ti nkehe nduáhya tjako ti chojni ch'ia tjínkaon chrókjuachròe ti chojni naxa noehña kixin sátsjiko sin ti ntia nduáhya. ¹⁵Méxra ícha jína chrónixjani ti nkehe chaxín ndoá la kaín aséni chrótjuèheni kíchóni, ndá chrók'uánkí ti kjuaxrexinkaon kuèténi éxi tjínkaon Cristo kixin jehe ch'an mé ti ikja ti cuerpo. ¹⁶*Ti kjuachaxin kuèté Cristo mé t'ónaxín kuenté ti cuerpo, tíha mé ti nínko, la nkokón ich'e ixra la nkokón tjinkítsa kícho. La xíkaha ts'ánkí ti ixra kuèté

Cristo la ko antsí ts'ánkí ti tjuèheni kíchóni.

Ti kjuachaxin nixin kuèté Cristo

¹⁷Tíhi mé ti nkehe tjonkara kixin kjuachaxien ihnié Ìnchéni. Mé tétuahanra kixin í chrók'uejohyara éxi tjejó ti sin chónhña Díos kixin ti nduáhya tjenkayáxin sin. ¹⁸Ti nkehe tjenkayáxin sin la éxi ijnko nkehe sítie tíha. Chónhña sin ti kjuachón tjajon Díos la tienxínhña sin kixin imá icha ti asén sin. ¹⁹La ó tsíkjinchek'itjáña sin ti kjuaxrexinkaon kuèté sin la í tósuèhya sin la tjaxonxón asén sin ti nkehe jínahña. Imá tóxríhin sin chrókjuasin sin kaín ijie. ²⁰Andá jahara jehya xíkaha xrákohara ti nkehe k'uetóan Cristo, ²¹ti chaxín kuihínra ti itan kuèté Ìnchéni Jesucristo la ko k'uitjára ti nkehe chaxín ndoá kjuako ch'an. ²²*La títóhéra kaín ti nkehe ntaxin k'uékjich'era ósé. Tíha mé ijnko nkehe nduáhya, ijnko nkehe jínahña t'ayahara. ²³Jahara ticháxin chrókónixin ti kjuaxrexinkaon kuètára la ko ti nchakuánra.

²⁴*Méxra chrókuákjára ti kjuaxrexinkaon nixin kjuích'éna Díos éxi tjínkaon ch'an, la chrókjuákoxinra ijnko nkehe jína la ko ndoá. ²⁵*Ndá xíkaha í chrónixjahyara kjuach'ia. La ko nkojnko

chrónixjehéra kichuara chaxín ndoá, kixin kaíni la nkokoa cuerpo kuènté Ìnchéni.

²⁶*Kjónté chrókónínkaonra, la chrókjuásinhñara ijie, la ko ti kjuanínkaon la chróchontahyara kuènté ñao ²⁷Chrokuájonhñara kjuachaxin kixin ti Jínahña chrók'uetuehen asánra.

²⁸Ti nkojinra teera la chrókuítóhéra ti kjuachee. Ícha jína itjára chrókjuich'exínra ixra kixin chróchontara chichaon kixin jína chrókjuínkítsara nkojín ti sin chaxín tichánxihin.

²⁹Chjiñéhña chrónixjara ijnko nkehe náxrxjónhña. Ícha jína chrónixjara ti nkehe jína kixin tíhi chrókjuinkítsa kaín ti sin tjejótihin. ³⁰Méxra nchek'aváhyara ti Nchakuén Díos kixin tíha mé k'uayéhéra éxi ijnko xroye la tíhi tjakoxin kixin jahara mé k'ónara chojni kuènté Díos, kixin ti ñao itsi Cristo ndá chaxín tsaxrjekjanxini ti ijie.

³¹Títóhéra kaín ti nkehe náxrxjónhña tjénkayáxinra, ti kjuanínkaon, ti t'óyakote kichuara, ti t'ándaxíhñra kichuara la ko kaín nkehe jínahña.

³²*Ícha jína chrókjuínchejína asánra la ko chrókuíkonoéhéra kichuara la ko chrók'uitjáñahanra ti ichrén ijie kjuasinhara sin, kixin xikaha Díos la k'uitjáñehen ti ijie kuènténi kixin ichr'án ch'an ti Xjeen ch'an k'uenyákohén ti ijie chóntani kaíni.

Chrok'uejora éxi ijnko xrohi t'inkaséñaxín

5 ¹Jahara mé ó k'ónara xjeen Díos la tjuahára Díos. Méxra chrókjuákoxinra éxi kjuakoxin ch'an. ²*Chrotjuehéra kichuara éxi Cristo tjehe ti jeheni la ko kjuenkayákohén ch'an ti ijieni, éxi ijnko kolélo k'óná sin la kjuínchechján sin, la k'uayéhe Díos ti xraxé náxrxjón.

³Andá jahara ó tinkachónkira Díos la í chjiñéhña tsonixjara nkojín nkehe nduáhya kuènté chojnichjin kixin kaín tíha la ijie, la ko ninkehó nkehe náxrxjónhña chrókjuénkayáxinra la chrókjuénkayáxinhñara kixin tsochontara itsjé nkehe tjete.

⁴La ko chjiñéhña chrónixjara ijnko nkehe kjuatosuéhe, la ko chrókjóhyara kjuachjanta la ko chrókónontónhñara kixin kaín tíha mé nduáhya. Ícha jína chrók'uitjára chróchjehéra Díos kjuasáya. ⁵Andá jahara la ó nohara kixin ti nkexro chrókjuasinko ijie ijnko chojnichjin jehya ichjién, ti nkexro ich'e nkehe jínahña, ti nkexro tjak'e asén tsochónta itsjé nkehe (tíha mé yóhe éxi chrókuínkáchónki sin ti nkehe tsíkjanõña), la ti nkexro a la xrokjuahya ts'ixehen ti t'etoxin Cristo la ko Díos.

⁶Méxra jahara chrókuítóéhyara chrókjuít'ayahara nkojín nkexro

nixja nkehe ninkehó sínkíhya, kixin ti nkehe jínahña mé tsixin ti kjuanínkaon kuènté Díos la sinchekjasóte ch'an kaín ti sin titekakonhña ti jehe ch'an. 7 Méxra í t'itonhñara ti chojni xikaha tjenkayáxin.

8 Jahara la ósé la kuék'ájira ti sítie. Andá ijie la tjejora ti t'inkaséña kixin tinkachónkira Ìnchéni. Méxra chrókjuáqoxinra kixin ó tjejora ti itjen ti xrohi t'inkaséña kuènté Díos. 9 Kixin ti xrohi t'inkaséñaxín la mé tjinkítsa kixin tsjakoxini jína la ko tsonixjani ti nkehe chaxín la ko ndoá ts'ejóni. 10 Méxra chrókóxakohanra chrókjuéyára ti nkehe tóxríhín Ìnchéni.

11 Chrokuankiéhyara ti sin tjenkayáxin nkehe nduáhya, kixin jehe sin mé tjejó sin ti sítie. Ticháxin chróndáchera sin kixin ti nkehe tjenkayáxin sin la nduáhya. 12 Kixin kjónté chrókjoni kuènté ti nkehe ómó ich'e sin la ijnko kjuatosuéhe tíha. 13 Méxra kaín nkehe la tsonoxín kixin ti xrohi la sinchenoxín kaín ti nkehe síín, á nkehe jína o náhí. 14 Mé xikaha ndáchro sin:

Xraxeñian jaha tjéchrian;
t'axrjékjanxian ti síín ti sin tsík'en,
kixin Cristo mé tjetjoka ti xrohi ts'inkaséñaxián.

15 Méxra ijnko nkehe jína chrókjuénkayáxinra; jehya

éxi ti sin lontj chóntahya kjuaxrexinkaon jína, náhí. Chrok'uejora éxi ijnko chojni nohe, chóna kjuaxrexinkaon jína. 16 *Chrokóxakohanra chrókjuich'era ixra éxi tjinkaon Ìnchéni kixin ijie la imá síín nkehe jínahña.

17 Méxra chrók'ónahñara ijnko chojni lontj. Chrokóxakohanra chrókiénxinra ti nkehe tóxríhín Ìnchéni. 18 Chrokókoanhñara kixin tíha la ts'itjáñaxinra nkochríxín. Ícha jína chrókjuájonra kjuachaxin kixin Nchakuén Díos chrók'uetuehen ti jahara. 19 *Chrotsjera salmo la ko himno, la ko kaín asánra chrókjuíkosáyehéra Ìnchéni.

20 Nkochríxín chróchjehéra kjuasáya It'éni Díos kixin kaín ti nkehe kjuajon ch'an, chróchjeéxinra kjuasáya ti ihnié Ìnchéni Jesucristo.

Jína chrók'uejóni kixin tinkáchónkini Ìnchéni

21 Chrokjuinchexiteyéhe kichuara kixin ó tinkachónkira Ìnchéni. 22 *Méxra ti chojnichjin ó tsíkótehe la chrókjuinchexiteyéhe ti xii éxi nchexiteyéhe sin Ìnchéni.

23 Kixin ti chojnindoa mé chóna kjuachaxin ts'etuehen ti ichjién éxi Cristo mé ikja ti nínko. Mé xikaha Cristo mé kjuínchekaá ti nínko, kixin ti nínko la cuerpo kuènté ch'an. 24 Méxra éxi ti

n̄nko nchexiteyéhe Cristo, la x̄ikaha ti chojnichjin ts̄ikótehe la chrókjuinchexiteyéhe ti x̄i.

²⁵*La ko k̄jaxin ti chojnindoa chrótjuehé ti ichjién éxi Cristo t̄juehe ti n̄nko la ko k'uenyákohen. ²⁶Ik'uén Cristo kixin sinchetjóa ch'an ti sin n̄nko, k̄juínchetjuáxin ch'an ti int̄a kuikitexín sin kixin kuitekaon sin ti itén ch'an. ²⁷Mé x̄ikaha j̄ina ts'áyéhe Cristo ti jeheni kixin jeheni mé ijnko n̄nko náxrjón chóntahya ninkehó k̄jita, ijnko n̄nko tjóa la ko ndoá. ²⁸Mé x̄ikaha ti chojnindoa tsot̄juehe ti ichjién éxi t̄juéxin asén. Ti nkexro chaxín t̄juehe ti ichjién mé k̄jaxin t̄juehe asén. ²⁹Méxra k̄ja nijnko chojni chrókóninkakohen ti cuerpo kuènté. Náhí. K̄ja chrókjonie sin j̄ina la chrók'uayakohen sin ti cuerpo kuènté sin la x̄ikaha Cristo t'ayakohen ti n̄nko. ³⁰Kixin ti cuerpo kuènté Cristo mé jeheni, kixin jeheni mé k'óna ti cuerpo kuènté ch'an la ko ti huésqe ch'an. ³¹*Mé x̄ikaha ndáχρο: “Ti chojnindoa la ts̄ítóhe ti it'é la ko ñ̄e la tsonkojié ti ichjién la yóí sin mé ts'óna sin éxi nkokoa chojni.” ³²Tíhi la ijnko nkehe imá ijié la ko imá ixra la tsjachahya chojni tsienxín. Méxra janhan xrjanká kuènté Cristo la ko ti n̄nkué ch'an. ³³Méxra nkojnko

ti chojnindoa la ticháxin tsot̄juehe ti ichjién éxi t̄juéxin asén, la ko k̄jaxin ti chojnichjin chróchóntehe k̄juasàya ti x̄i.

6 ¹*Andá jahara chájan chrókuitekákohénra it'ára la ko ñára, kixin x̄ikaha tjinkaon ñchéní kixin tíha mé ijnko nkehe j̄ina. ²*Tíhi mé ti nkehe saoxín tsfk'et̄oan Díos kixin tsoxiteyá ndá tsjinkitsa ch'an ti jeheni, mé ndáχρο: “Chrokuíkosáyehéra it'ára la ko ñára, ³ndá x̄ikaha tsocháhara la ko itsjé ñ̄ao naxa chrók'uejora ntihi chjasintajni.”

⁴*Andá jahara it'é xjan, chjiñéhña chrókjuinchekónínkáonra ti xjaanra. Ícha j̄ina chrókjuinchek'ánkíxienra xjan ti k̄juaxrexinkaon j̄ina kixin chrók'uitja xjan chrókuinkáchónki xjan ñchéní.

⁵*Andá jahara ch'exónra ixra, la chrókuitekákohénra ti lamo ch'ehéra ixra ntihi chjasintajni, la ko chróchontehéra k̄juasàya la ko chróchrakohénra sin la ko chrókjuinchexiteyéhéra sin éxi t̄jeonchexiteyéxinra ñchéní Cristo. ⁶Ti ixra s̄ich'era la j̄ina chrókjuich'era, jehya jehó ti ó t̄jéjósjehe sin ó kixin tsondáχρο sin kixin jahara la chojni j̄inara. Náhí. K̄jonté kohya sin la kaín asánra chrókjuich'era ixra éxi chrókjuich'ehéra ixra Cristo

5:25: Col. 3:19; 1Pe. 3:7. 5:31: Gn. 2:24. 6:1: Col. 3:20. 6:2: Ex. 20:12; Dt. 5:16. 6:4: Col. 3:21. 6:5: Col. 3:22-25.

kixin xikaha tóxríhjn Díos.
 7Kaín asánra chrókjuich'era
 ixra éxi ch'ehéra ixra Ìnchéni,
 la jehya éxi chojni ó ch'ehéra
 ixra. 8 Jahara la ó nohara kixin
 Ìnchéni la tsjenkehe nkojnkon
 kixin ti ixra ich'eni, á jeheni
 chojni ch'exón ixra o náhí.

9*Andá jahara lamo,
 nkojína chrókuétuehénra
 ti sin t'ahara ixra la ko
 chjiñéhña chrók'oyakotera
 sin. Xráxinkaonra kixin jahara
 la ko jehe sin mé nkokón
 chrókjuinchexiteyéhéra Ìnchéni
 itjen nkajní, kixin kaín chojni la
 nkokón t'íkon Díos.

**Ti nkehe t'ayakohen ti sin
 tinkáchónki Ìnchéni**

10 Andá ijie kíchóni,
 chrókjuinchefuerte asánra,
 kixin chóntani ti kjuachaxin
 ijie kuènté Cristo. 11 Mé
 xikaha antsí chrókjuéyára ti
 kjuachaxin kuènté Díos éxi
 ijnko ika chrók'uinkayára, kixin
 chaxín ndoá chrók'uejora kixin
 chrókuitekákonnhára ti kjuach'ia
 kuènté ti Jínahña. 12 Kixin jeheni
 la tjajonkohñani chojni chóna
 into la ko hueso. Náhí. Jeheni la
 tjajonkoni ti nchakuén jínahña
 chóna kjuachaxin chrínkí nkajní
 la ko ti chjasintajni sítie. 13 Méxra
 chrókuákjára kaín ti kjuachaxin
 kuènté Díos kixin chrókjuachara
 ti itsi ti kjuaxróxinhña, la ti ó
 tsjixin tsjajonkoára ti Jínahña



*Ts'itsani éxi ti soldado
 (Ef. 6:13)*

ndá chaxín chrókóxakohanra
 chrók'uejotsjehera
 jína. 14*Chaxín ndoá
 chrók'uejora chrókuitekáonra
 ti itan chaxín kixin tíha
 ts'ayakohanra éxi ti tjoa
 t'inkat'óxin ijnko soldado, la
 ko jína chrók'uejora la tíha
 chrókuaáxinra éxi ijnko soldado
 tsík'inkáya ijnko ika tsík'ónaxín
 chika. 15*Chrokóyaxíhanra
 chróchronkara ti itan náxrjón
 tjajon kjuaxróxin éxi ijnko
 soldado tóxakohen tsjanka totjoé
 mé xikaha chrókóxakohanra.
 16 Tíha la antsí tjeotan kixin
 kaínra chrókóxakohanra
 chrókuinkachónkira Ìnchéni
 chaxín. Tíha la éxi ti chika
 chóna ti soldado ti itjakjon

kixin ts'inkákonhēn ti flecha síchr'ákjen xrohi kuèté ti Jínahña. ¹⁷*Chrokuákjára ti kjuachón éxi ijnko kásko tjasin chojni kixin kohya nkehe tsohen ti ikja, la ko tjetean chrókuitekáonra ti itén Díos, kixin tíhi la éxi ijnko chika espada tsíkajon Nchakuén Díos, k'uayéhéra. ¹⁸Chrokuítóéhyara chrónixjehéra Díos; nkochríxín chróchronoehéra ch'an la ko chrókjuanchatóxixínra ti Nchakuén ch'an kixin tsjinkítsara ch'an. Chrok'óxrjéhyara chrók'uejotsjehera chrónixjehéra Díos kixin tsjinkítsa kaín ti sin tinkáchónki ti jehe ch'an. ¹⁹Chronixjehéra Díos kixin kjaxin janhan tsjinkítsa ch'an la tsakítjehe ch'an ti ir'ua kixin jína tsoxrjanka ti itén ch'an, kixin tsihin chojni ti nkehe k'uénoehña sin kixin nkexrín itjen ti itan tsaáxin chojni. ²⁰Díos mé ichr'án

ti janhan kixin tsoxrjanka ti itén ch'an, mé xíkaha tjéchjínaxián ijie. Nixjehéra Díos kixin jína tsoxrjankaxián ti itén ch'an.

Ti kjuixixín nixja Pablo

²¹ *Tíquico, ti kíchóni chóxini jína, mé kjuínkítsa kjuích'e ixra kuèté Ìnchéni, jehe ch'an tsochronka ch'an nkexrín itjén la ko nkexrín ti ixra tjét'a. ²²Méxra janhan ichr'án ch'an tsjjitsjahára ch'an kixin tsochronka ch'an nkexrín tjejóni ntihi la xíkaha imá chrókócháhara.

²³Méxra It'éni Díos la ko Ìnchéni Jesucristo mé tsjajon ti kjuaxróxin ts'ayéhéra kaínra kíchóni kixin antsí tsotjuehéra kichuara la ko antsí chrókuitekáonra Díos. ²⁴Díos sincheñao kaín ti sin chaxín tjehe Ìnchéni Jesucristo. Mé xíkaha tsohen. Ó tjen.